

Pueblo por tin sigur cu POR lo bin cu dimensionnan nobo

Segun Andin Bikker



ANDIN Bikker, miembro di Partido POR, Plataforma Forsa Nobo, na ocasion di e presentacion di dos candidato nobo riba nan lista, sr. Curtis Fraser y sra. Robin Ann Diddy, di districto di San Nicolas a tuma palabra, prome cu e rueda di prensa extraordinario a conclui.

El a bisa na e dos candidatonan nobo cu sin duda no ta facil pa drenta arena politico, y cu ta di respeta e decision aki.

E candidatonan aki a trece dilanti dos tema cu POR a touch a subraya y duna hopi importancia cualnan ta educacion y reforza Parlamento.

El a para un rato riba reforzamento di Parlamento y a bisa: manera boso sa for di 2010 caba, apenas un par di luna den Parlamento, mi persona realisando cu un Parlamento cu un democracia hoben manera Aruba ta, cu apenas 30 aña di existencia como pais, mi a traha un concepto pa un reglamento di orden nobo, pasobra na final di dia, Parlamento ta reuni y opera riba e reglamento aki.

Lamentablemente, varios biaha cu sosten di Marisol Lopez-Tromp como voorzitter nos a purba pa e reglamento aki bin na vigor, pero gran mayoria den e Parlamento no a dun'e importancia, y nos ta wak cu gran

parti di e votadornan, e mileniusnan eyfo cu ta e grupo mas grandi cu ta bay participa den e eleccionnan venidero, hopi biaha nan ta expresa nan frustracion y desapunto, con Parlamento ta funcionando.

Bikker a bisa cu ta pa e motibo ey e ta sumamente contento cu aworaki e dos candidatonan a expresa esaki, sr. Fraser, bisando cu p'e ta di importancia sumamente grandi di reforsa Parlamento y sr. Otmar Oduber a bisa ora e Plataforma nobo a wordo anuncia.

P'esey e ta hopi orguyoso di mira cu un candidato a tuma esaki como tema central y principal y seguramente e tin rason cu mester pone atencion na esaki.

Encuanto enseñansa y educacion nos a haci un bishita na Mexico caminda nos a experiencia virtualmente e Congreso EDUCA, cu ta pa henter America Latina y nos a mira con hopi tecnologia aworaki ta facilita y reforsa e trabao di maestronan.

E ta sigur cu Roben Ann cu su background y cu e ta un hende hopi progresista ta bay make cu tecnologia y pueblo di Aruba por ta sigur cu POR lo hiba dimensionnan nobo y nos lo hiba nos pais dilanti.

Na final Bikker a bisa cu aunke hopi hende no ta realisa, na final di dia ora a pone un plataforma di un partido e ta sirbi su pais, y no e politiconan mes.

"Diasabra cu ta biniendo nos ta bay celebra un dia mas cu hopi amor Patrio, pero sigur boso por conta cu cada un di nos, esnan cu ta aworaki y esnan no presente pero cu nan spirito cu nos, nos lo bay sirbi e pueblo digno di Aruba", el a conclui.

Marisol Lopez Tromp:

POR lo pusha pa reunion publico bin y aproba ley Ombudsman



DEN rueda di prensa di Partido POR, Plataforma Forsa Nobo, e candidato sra. Marisol Tromp a elabora rib'e topico di Ombudsman y Kinder Ombudsman, cu ta un proyecto cu a wordo discuti pa varios aña caba, pero ainda no ta un realidad.

Marisol a trece dilanti cu esaki ta un topico cu pa hopi aña segun como casi 20 aña caba, caminda cu Gobierno a bin Gobierno a bay, tur a bisa cu Aruba mester di un ombudsman.

"Tres aña pasa, ora mi a bira Presidente di Parlamento, conhuntamente cu tur fraccion, nos a instala un comision special p'asina e tres fraccionnan traha rib'e ley y cu sosten di tur e ley a keda traha", Lopez- Tromp a declara.

E fraccionnan a keda reuni hopi tocante kico ta posible pa Aruba, con pa hacie, etc., hasta cu e ley a keda cla pa bay un reunion publico y tambe ta asina cu esaki a bin cu hopi mas enfasis.

Marisol a bisa cu desde cu durante e reunionnan interparlamentario na Hulanda a bin e rap-

port di UNICEF cu a papia riba e derechonan di nos muchanan di e region Caribense na unda Aruba tambe a wordo evalua, mescos cu Corsou y e otro islanan, y a bisa cu ta primordial pa Aruba y e otro paisnan di Reino conoce no solamente Ombudsman pero un Kinder Ombudsman tambe.

Defensor di "Corsou tine pa diez aña caba, Sint Maarten tin di dj'e, y na Hulanda tin un cantidad den diferente region, pero Aruba ainda falta. Y nos meta ta pa pusha pa e bira un realidad.

Un bez cu e ley pasa si e Presidente di Staten na e momentonan aki dicidi di yama un reunion publico y esaki sosode, e siguiente paso ta cu mester wordo elegi e Ombudsman y e Kinder Ombudsman tambe", Marisol Lopez-Tromp a splica.

A enfatisa cu Ombudsman no ta un hende cu gobierno ta bay nombra. Gobierno no tin un dede den esaki.

"E ta algo cu segun ley Parlamento di Aruba ta haya un proposicion di tres instancia imparcial:

Den e caso aki e voorzitter di Reken Kamer, e voorzitter di Raad van Advies y e Corte Comun di Husticia. Nan tres lo presenta e candidatonan segun e proposicion di ley aworaki", el a bisa.

Lopez- Tromp a conclui bisando cu si e proposicion di ley wordo aproba e tres instancianan menciona lo presenta e tres candidatonan cu segun nan por carga e funcion

aki y e ora ey ta Parlamento ta dicidi esaki y vota pa e candidato of candidatanan cu ta cumpli cu e rekisitonan y por haci e trabao aki na un forma autonomo y imparcial pa nos pais.